

自序

難矣哉。作高僧傳也。昔幽溪大師曰。高而不名者。既潛光而弗聞。名而不高者。又寡德而不誌。作傳之難。於斯可見。甲戌春。余既出家。受戒國清。寺主可興長老。命將寺中歷代高僧。編傳付梓。俾後進於道者。易啓追慕。攀效之心。而有所表率。而國清悠久。光明之歷史。亦得宣示一二於社會人士之前。洵美舉也。余雖不才。敢辭其責。惟國清爲台教中心之所。東南名刹之一。創自隋代。迄今千數百年間。傳燈諸祖。雲水高僧。何可勝數。第所謂高而不名者多。欲求其人其事。十難獲一。遑論全豹。

故余自始編述以來。或稽自高僧古傳。或採自志書語錄。或述所聞於先德耆舊。窮半載之功。而所得者。自智祖及於諦老。先後仍不過五十餘人而已耳。嗚呼。先賢後哲。直心行道。固不若世俗之人。有意留名於後世。然後進慕道者。又未嘗不以其湮沒無聞而爲憾也。編旣成。余之責旣了。可公之願亦滿。爰綴數語於端。以誌發啓之緣由。其有可考而遺漏者。且容續版時補入之。蘊光序。

國清高僧傳目錄

隋智者大師傳

普明禪師傳

法彥禪師傳

波若禪師傳

智越禪師傳

法智禪師傳

唐智寂禪師傳

智晞禪師傳

章安大師傳

智操禪師傳

法華禪師傳

慧威禪師傳

左溪禪師傳

一行禪師傳

荆溪大師傳

行滿禪師傳

代病尊者傳

道邃禪師傳

文舉律師傳

至行禪師傳

豐干禪師傳

寒山大士傳

拾得大士傳

潞山大師傳

物外禪師傳

清觀禪師傳

元琇禪師傳

五代

清竦禪師傳

師靜禪師傳

宋延壽禪師傳

義寂法師傳

本先禪師傳

本空禪師傳

居昱禪師傳

慈雲大師傳

法真禪師傳

蘊常禪師傳

簡堂禪師傳

普紹禪師傳

指堂禪師傳

明夢堂禪師傳

岱宗禪師傳

裘聖僧傳

易庵禪師傳

清寶琳禪師傳

耀冶禪師傳

文勤禪師傳

淨鑒禪師傳

授心禪師傳

玉峯禪師傳

靜海禪師傳

授謙禪師傳

國民

諦閑法師傳

附錄

寒山詩 五十六首

國清高僧傳

台州沙門蘊光編

智者大師傳

大師諱智顗。字德安。潁川陳氏子。寓居荊州之華容。母徐氏。孕時夢五彩香煙縈繞於懷。拂之不去。又夢吞白鼠者三。怪而卜之。白龍之兆。及誕。室內洞明。信宿乃止。目重瞳。堯眉禹背。臥則合掌。坐則西向。稍長。見佛必拜。遇僧必敬。年十八。投湘州果願寺出家。尋參光州大蘇山慧思禪師。受業心觀。思一見曰。昔在靈山。同聽法華。夙緣所追。今復來矣。卽示普賢道場。爲說四安樂行。師

於其地。行法華三昧。始經三夕。誦藥王品。心緣苦行。至
是真精進句。寂然入定。解悟頓發。見共思師。處靈鷲七
寶淨土。聽佛說法。思師證之曰。非爾弗感。非我莫識。此
法華三昧。前方便也。學既成而往辭。思曰。汝於陳國有
緣。往必有利。思既遊南嶽。師乃詣金陵。於瓦官寺。創宏
禪法。僕射徐陵。尚書毛喜輩。並稟禪慧。俱傳心要。一夕。
夢中忽見巖崖萬疊。雲日半垂。其側滄海汪洋。渺無涯
際。又見一僧。搖手伸臂。至於岐麓。挽之上山。既覺。以告
門人。門人曰。此乃會稽之天台山也。太建七年。師移錫
蒞止。時有青州僧定光者。居山已四十年。神異多端。見

師問曰。大善知識。還憶昔年攜手呼喚事乎。審視之。卽
往日夢中所見僧。光曰。勝地有緣。應止於此。師遂卜築
於螺溪之源。佛隴之南。光又告曰。且隨宜草舍。至國清
時。三方統一。自有貴人爲禪師立寺。行見殿宇崔嵬。滿
於茲山。厥後楊氏建國。勅建國清寺。其語以驗。後獨居
華頂峯。習頭陀行。屢遇大風拔木。雷霆震吼。輒有魑魅
魍魎。吐火厲聲。千形百狀。環繞其側。師惟抑心忍之。時
復心煩身痛。如被火炙。並見亡親。枕膝陳苦。師卒不之
動。久之。心旣不移。境亦自滅。宣帝欽其德。詔返金陵。先
後凡七使。師應徵往。講智論及仁王經於太極殿。帝親

執弟子禮。北面受教。百僚同承道法。未幾。陳亡。轉遊荆楚間。嘗於江陵玉泉寺。講法華玄義。閱時三月。九旬談妙。後世傳爲美談。開皇十一年。晉王廣於揚州設千僧會。屈授菩薩戒。師躬傳戒香。授律儀法。命名曰總持。而晉王奉以智者之號。十四年。仍返天台。棲止。計師東西垂範。化通萬里。前後造寺。大者三十六所。佛像八十萬軀。度僧一萬四千人。五十餘州。習禪學士。皈依受菩薩戒者。不可勝紀。又嘗贖六十餘所魚簷溪梁。作放生池。表聞於朝。嚴禁漁採。是故龍天致敬。遠近歸化。道風之盛。未有過於是者。開皇十七年。途次剡東石城寺。忽謂

徒衆曰。吾將終於此矣。施榻西向。端坐念佛。或問大師證入何位。沒後何生。師曰。吾不領衆。必淨六根。損己利他。只登五品。吾諸師友。今從觀音勢至至。同來迎我。言訖。寂然而化。如入三昧。春秋六十有七。全身塔於金地道場。

普明禪師傳

禪師。本名法京。會稽朱氏子。自幼。口常稱佛。或膠土作像。或樹草爲塔。不樂俗戲。有僧過其門。勉令出家。並語曰。天台有至人示現。可往依之。陳太建間。智者垂化。佛隴師往。頂禮歸依。智者笑曰。宿世願力。故相值也。自是

勤侍左右。專求禪法。未幾。陪從入廬山。於陶侃瑞像閣。行道感異。易名普明。既居國清。神異多端。時廚室去水遙遠。衆苦之。師以杖指園隙砌石曰。若令此石出水。得非快事乎。泉卽湧出。日給千衆。遺蹟尙存。國清精舍。創自隋初。講堂狹隘。不敷衆座。師欲廣之。章安以木材不易致。力阻其議。俄而括州都督周孝節施杉柱。泛海而至。章安於赤城。遙見師身長十餘丈。高出林表。翼從數十人。曰。幸兄勿再諫。事願尅成。章安感其異。合掌致敬。曰。一依仁者之願。舉工之日。感山神隱形而至。朝夕往返於佛隴國清間。凡所經處。闊一步許。樹木摧折。師懇

切與語。勸令行善。衆人咸之聞。而莫之覩也。師平日苦節行道。冬不衣絮。檀信所施。隨緣喜捨。隋主尊其德。屢饋珍物。悉以均給衆人。未嘗以寸物自私。旣而建堂功畢。呼諸弟子。囑曰。世事無常。人命有限。吾其去矣。汝等勉之。遂安坐脫化。屈其三指。表證三果之位。

法彥禪師傳

禪師。俗姓張。清河人。北朝周武廢教。渡江避難。遇智者於金陵。太建七年。陪從入天台。服膺請業。深得禪那之旨。自是不居廬舍。巖棲谷飲。習頭陀十二苦行。山神數嬈試之。恬不爲動。每入定。七日方起。所證法相。具陳於

智者。智者證之曰。是背捨觀中第二觀相也。大業七年。坐脫國清。春秋六十。

波若禪師傳

禪師。高麗人。初遇智者於金陵。聽講智論。深解義趣。隋開皇間。遊方至天台。求授禪訣。密有契悟。智者謂曰。汝於此有緣。宜閑居靜處。成就妙行。華頂峯高地靈。適合大乘根器。昔余棲止頭陀之所。汝往居。必有深造。師遵旨往。結茅其處。曉夜行道。至忘寢食。影未出山者一十六年。大業間。忽來國清。自云壽命將盡。特來與諸大衆別。路過佛隴。有人見三白衣。擔衣鉢從。俄忽不見。未數